

Ella metta in movimaint milliuns

L'Engiadinaisa Barbla Graf es daspö 40 ons pro'l medem patron. La duonna da 62 ons ha cumanzà sco secretaria pro'l Padrinadi svizzer per cumüns da muntogna ed es uossa amo adüna là, daspö l'on 1998 sco manadra da gestiun. Culla FMR ha ella discurrì da sia paschiun pellas regiuns muntagnardas.

«Quai nu possa dir», es üna resposta cha Barbla Graf dà ün pèr jadas cun ün surrier a dumondas da la schurnalista massa indiscreta. Ma na per forza concernent chosas privatas, dimpersè be, tuottafat seriosa e professionala, in connex cun progets e donaturs dal Padrinadi svizzer per cumüns da muntogna (verer chaistina) chi vöglan restar anonims.

Eloquenta, averta e precisa, ma eir l'è dret mumaint discreta – quai sun be quatter chavazzins chi descrivan a Barbla Graf in sia rolla sco manadra da gestiun dal Padrinadi svizzer per cumüns da muntogna. L'Engiadinaisa chi d'èira partida vers Turich cun 21 ons nun es propcha gronda, ma istess fa ella impreschiun, vestida bain cun stoffas lommas, sco ch'èlla haja gugent quai. La chavliura naira suot controlla quinta ella co cha quai saja da dumandar per raps, valüter progets e refusar dumondas, schi nu correspundan brich a las reglas.

Maschina da scriver cun cassetinas
Barbla Graf ha fat carriera pro'l Padrinadi svizzer per cumüns da muntogna. Cumanzà ha ella l'on 1984 sco secretaria. «Eu vaiva let in gazetta ün inserat, ingio chi vaivan scrit: «Lieben Sie die Berge und möchten Sie in Zürich arbeiten? Quai m'ha persvasa ed eu m'ha annunzchada e n'ha bain surgni la piazza», as regorda Barbla Graf.

«Eu n'ha fat müdada a Turich sainza cugnuscher ad inchün. Al cumanzamaint d'èira quai schon greiv, impüstüt l'utuo cur ch'eu telefonaiva insü ed els am dschavian che bell'ora chi hajan ed a Turich d'èira gronda tschiera.» Cha da quel temp haja ella fat bieras primas experiencias, cuntinuescha

l'Engiadinaisa. «La prüma jada ch'eu sun ida cul tram, d'èira ida bier massa bod pro la staziun – eu nu savaiva cha'ls trams vegnan mincha desch minut – ma eir da laschar oura il dret bigliet d'èira üna sfida», quinta Barbla Graf. Cha per furtüna haja üna duonna badà ch'èlla dovraiva agüid.

E lura il prüm d'el büro dal Padrinadi svizzer per cumüns da muntogna: «I nu d'èira ingün büro per mai. Eu n'ha il prüm stuvü far uorden per drizzar aint üna piazza da lavur. Ma ün dals highlights d'èira cha nus eschan its a cumprar per mai üna maschina da scriver riscch nouva», quinta Barbla Graf ed agiundscha: «Quai d'èira lura üna da quellas cun cassetinas, propi modern per quel temp.»

Fat carriera sainza scolaziun

La scuola primara e secundara ha Barbla Graf frequentà a Sent, davo ha ella absolt la scuola da commerzi a Plan ed es ida a lavurar a Cuoira per differentas sgüranzas avant co partir per Turich. Cün quai ch'èlla s'haja fingià adüna ingaschada pellas regiuns muntagnardas e guida gugent ingio chi fetscha dab-sögn, saja quella lavur pro'l Padrinadi svizzer per cumüns da muntogna adüna statta satisfacenta. Cha pass per pass haja ella fat ed impraiss tuot da giosom sü. «Eu n'ha eir adüna gnü buns patrüns e cun quai buns magisters. E quai ch'eu nu savaiva n'haja impraiss», declara la manadra da gestiun. Ed uschea ha ella fat carriera tuot sainza scolaziun externas ed es uossa daspö 27 ons scheffa dal büro dal Padrinadi svizzer per cumüns da muntogna a Turich. In quella posiziun es ella respunsabla per scumpartir var 20 milliuns francs e decider davart passa 350 dumondas, las qualas vegnan inoltradas on per on.

Cun dapli raps pudaina güdar dapli

A la dumonda co ch'èlla fetscha quai, da ramassat minch'on plüs milliuns, nu vuol Barbla Graf il prüm propcha gnir oura culla pomma. Ma davo admetta ella, chi dependa da plüs facturs: «Eu cugnusch üna massa gliued e sa intant a chi ch'eu poss dumandar per chenüms progets.» Plünavant tradischa ella però cha la somma ramassada es quai chi metta ad ella suot squitsch: «Nus cumanzain minch'on darcheu pro nolla e



Barbla Graf, oriundamaing da Sent, lavura fingià daspö 40 ons a Turich pel Padrinadi svizzer pels cumüns da muntogna. fotografia: mad

meis böt es dad esser adüna megltra co l'on passà.» Cha cun dapli raps possan els eir sustgnair dapli progets, quai saja bain evidaint.

Cur cha Barbla Graf ha cumanzà sco manadra da gestiun d'èira la somma da raps ramassats desch jadas plü pitschna, nempe var duos milliuns. Cha'l nomer da dumondas inoltradas invezza saja restà plü o main medem – var 350 dumondas survain il Padrinadi svizzer per cumüns da muntogna minch'on. Dumondas per sustgnair infrastruttura in cumüns muntagnardas, ma eir per agüid per scoules e scoulinas, e, sco cha Barbla Graf declara, dürant ils ultims ons adüna dapli eir agüid per fabricar sü darcheu chosas davo catastrofes da la natura.

Ma ch'adonta da las catastrofes da la natura, sajan quistas regiuns muntagnardas quai chi detta forza a Barbla Graf da far inavant. «Grazcha a mia lavur n'haja impraiss a cugnuscher uschè bieras bellas vals e cumüns», declara la manadra da gestiun tuot entusiasmada. Cha'l temp nu basta mai dad ir a visitar tuot ils progets, ma tuot quai ch'èlla haja vis dürant ils ultims ons, saja adüna darcheu stat bel. Eir il contact culla

gliued appreziescha ella fich. «Grazcha a mia lavur n'haja impraiss a cugnuscher il chantun Grischun, ma in fuond tuot la Svizra da tuot ün'otra vart.»

Las reglas valan per tuots

«Plü bod daiva schon minchatant da quels chi telefonaivan e dumandaivan per agüid, perquai ch'els cugnuschaivan fors ün commember da la suprastanza. Ma eu sun adüna restada stricta», declara Barbla Graf. Üna dumonda per sustegn sto accumpilr precis tuot las reglas, cuntinuescha ella. «E cun dumondas da l'Engiadina sun eu statta amo plü stricta e severa, per ch'ingün nu possa dir, ch'eu n'haja sustgnü tenor simpatias.» Cha cun quai chi nu sajan lur agens raps stopcha il Padrinadi esser sever e possa sustgnair be quels progets chi accumpilchan las premissas e sajan documentats sco chi tocca (verer chaistina).

Ch'èir scha bieras dumondas gnian hozindi per mail, hajan els in büro amo massas da dossiers in forma da palperidat elavurar, ma eir dad archivar e digitalisar, declara Barbla Graf las lavurs dal minchadi chi toccan eir amo pro seis

Solidaritè tanter muntogna e val

L'idea da solidaritè tanter las muntognas e las vals ha manà l'on 1940 a la fundaziun dal Padrinadi svizzer pels cumüns da muntogna. L'intent da quel es amo adüna da diminuir il dischequillier economic tanter las regiuns benestantas e las regiuns dischavantagedas davo la Svizra. Cün ün agüid chi's referischa al proget sustegna il padrinadi a cumüns debels da finanzas per mantgnair las regiuns muntagnardas abitate e chüradas. Grazcha a la solidaritè da la populaziun svizra pon gnir promovöts numerus progets l'è cumüns muntagnardas, tanter oter las infrastrukturas, la protecciun cunter privels da la natura, la reconstrucziun davo catastrofes da la natura, la fuormaziun e las piazzas da lavur pella generaziun giuvna. Specialmaing importantas sun sportas da fuormaziun e schanzas da lavur per impedir l'emigraziun dals umans giuovens e per tils pussibilitar ün futur activ. Il Padrinadi svizzer intermediescha eir tanter cumüns fermes da finanzas e fautors da la Bassa e regiuns da muntogna in bsögn e spordscha agüds directs in connex cul proget. Minch'on vegnan elavuradas var 350 dumondas per examinar la situaziun finanziaria e la productivitè da promoziun dals progets. Persunas dal fat evalueschan ils progets al lö avant chi gnia decis davart ün sustegn. (fmr/opm)

büro. «La qualità da las dumondas es dvantada plü professionala, quai eir perquai cha la gliued chi lavura l'è büros dals cumüns es scolada meglter ed eir plü qualificada co avant ons.» Ma per la paja, conceda Barbla Graf, «es tuot eir gnü plü complichè». Pervi da tuottas sorts ledschas e reglas da fabricar nun es tenor ella neir na plü uschè simpel da sustgnair ils differents progets. Sco examplè declara Barbla Graf tuot salop: «Quel chaschöl chi faivan avant ons sün ün'alp d'èira fich bun, eir sainza respectar tuot las reglas e ledschas da l'UE, sco quai chi sto esser hozindi.» Olivia Portmann-Mosca/fmr

Paun, biera e dapü – üna visita i'l «Serlas Viva»

Illa zona da misteranza a S-chanf nu aviert üna butia e bistro cul nom «Serlas Viva».

Quella funcziuna tenor il concept da «shop-in-shop» e que's survain traunter oter paun da la furnaria Grond, bavrandas da la bieraria Engadiner Bier SA scu eir prodots da la Drogeria Zysset. Il böt dals iniziants es da schlarger l'assortimaint cun ulteriurs prodots regiunels.

«Nus lavurains già i'l Serlas Parc cun var 60 pertschient indigens e 40 pertschient giasts. Que stu tenor me eir eser uscheja, perche cha l'atmosfera es megltra e bgers as cugnuschon. Que pruvaiva uossa eir da fabricar sü cò il nou stabilimaint», disch l'impressari ed investur Christian Welte da S-chanf. El vaiva avaint 14 ans inizio il Serlas Parc – ün center per rampcher, boude-ring, fitness cun gastronomia e daintist – a Pur da la vschinaunha da S-chanf. E'l success da quist proget ho motivo a Christian Welte da realiser l'an passo

ün'ulteriura spüerta illa zona da misteranza. A regard l'architettura as tratta que tal nou fabricat quasi d'ün frer dal Serlas Parc. Però a l'intern nu's rechatta ün center per activitèds da temp liber – u meglter dit na dal tuot.

Na be üna vendita da rampas

Tal nou edifiziu traunter il Serlas Parc e la via chantunela as tratta que d'üna chesa da misteranza, ch'i'd es gnida fabricada dürant var ün an e mez ed ho aviert sias portas l'utuo 2024. Ella es traunter oter la nouva dmura da la bieraria Engadiner Bier scu eir il lö da produziun principel da la furnaria Grond.

«La bieraria ho già da prüma davent vlieu realiser üna vendita da rampas ed al listess mumaint haun la furnaria Grond scu eir Cafè Badilatti fat la dumanda a nus per metter ad ir ün bistro, però auncha i'l Serlas Parc», declara Christian Welte. Uscheja es alura pass per pass naschida l'idea da realiser üna butia cun bistro illa nouva chesa da misteranza, qualchosa chi nu d'èira insè previs da prüma davent. La nouva butia ho alura aviert sias portas suot il nom «Serlas Viva» la fin da l'an passo e's rechatta i'l paun terrain da la chesa da misteranza.



«Serlas Viva» a S-chanf funcziuna tenor il concept da «shop-in-shop» cun differents prodots regiunels. fotografia: Martin Camichel

Program da trid'ora

Eir schi nu's tratta tal nou stabilimaint d'ün center per activitèds da temp liber – scu il Serlas Parc – do que lo però eir üna spüerta per activitèds a l'intern. Que vegnan nempe organisadas duos voutas l'èivna guidas cun degustaziun tres la bieraria. Similas guidas sun eir previsas per la furnaria Grond e que es planiso da brastuler live caffè da Badilatti illas localitèds da la nouva butia. «Activitèds da trid'ora

sun auncha adüna s-charsas in Engiadina e cul Serlas Parc vaina vis dürant ils ultims ans cha quellas sun fich dumandadas. «Serlas Viva» es uscheja ün'ulteriura spüerta cò illa zona da misteranza e ch'i'd es al listess mumaint eir ün lö d'inscunter per tuot an», declara Christian Welte.

Concept da «shop-in-shop»

Perque nu vezza l'impressari da S-chanf la nouva butia neir na scu

granda concurrenza pel Volg da S-chanf. El disch: «Pigliand oura il paun cha nu scu eir il Volg vendains – nu'n concurrenzainza grand. Impü nu vaina neir na üngüns prodots tipics da minchadi scu il Volg.» El agiundscha cha la nouva butia nun es perque neir na ün masdügl da tuot las chosas pussiblas. «Serlas Viva» vain nempe gestiunada tenor il concept da «shop-in-shop». Que vuol dir cha mincha ditte ho sia egra pitschna partiziun, inua ch'èlla spordscha sieus prodots. La bieraria Engadiner Bier SA venda sias bavrandas in ün sector, la furnaria Grond ho sia bauncha da vendita inua cha's survain il paun e caffè da Badilatti e la Drogeria Zysset da Samedan spordscha üna schelta da prodots sün diversas curunas.

Pel mumaint survain eir la bacheria Hatecke üna partiziun e Christian Welte vuol in futur schlarger la spüerta cun ulteriuras dittas e producents regiunels. E per l'investur esa inavaunt eir important d'esser cò pels indigens e pellas indigenas. El disch: «L'important es – e que vaina eir vis tal Serlas Parc – cha'd essans cò tuot an per la clientella. Perque es eir «Serlas Viva» aviert 365 dis l'an.»

Martin Camichel/fmr